

## ԳՈՒԳԱՐԱՑ ԹԵՄԻ «ԾԻԾԵՌՆԱԿ» ՃԱՄԲԱՐՈՒՄ

Գուգարաց թեմում «Ծիծեռնակ» ճամբարի «Ամառ-2007» շրջանի բացումը մեկնարկեց հունիս 23-ին: Ճամբարը գործելու է մինչև օգոստոսի 26-ը՝ 4 հերթափոխով՝ իր հարկի տակ ընդունելով անապահով և կարոտյալ ընտանիքների թվով 800 մանուկների ինչպես Լոռու մարզից, այնպես և հանրապետության տարբեր քաղաքներից ու գյուղերից:

Գուգարաց թեմի առաջնորդ Գերաշնորհ Ս. Սեպուհ եպս. Չուլջյանի օրհնությամբ հունիսի 26-ին կայացավ ճամբարային շրջանի հանդիսավոր բացումը, որին ներկա էին Լոռու մարզպետ Ա. Քոչարյանը, քաղաքապետ Ս. Դարբինյանը, հոգևոր հովիվներ թեմի բոլոր տարածաշրջաններից, մարզային ու քաղաքային իշխանությունների ներկայացուցիչներ:

Բացման հանդիսավոր տողանից հետո ճամբարականները ներկայացրեցին «Ծիծեռնակ»-ի անցած ուղին, իրենց ջերմ շնորհակալության ու երախտագիտության խոսքն ուղղեցին Սեպուհ Սրբազանին և ճամբարի բոլոր բարեկամներին, որոնց աջակցությամբ գործում և հազարավոր երեխաների իր հարկի ներքո է հավաքում «Ծիծեռնակ» ճամբարը:

Առաջնորդ Սրբազանն իր օրհնության խոսքը ուղղելով հավաքվածներին, երեխաներին հորդորեց լինել է՛լ ավելի քաջարի և գիտակից հայրենասերներ, հավատարիմ մնալ մեր նախնյաց հավատքին ու Եկեղեցուն: Սրբազան Հայրը գնահատանքի խոսք ուղղեց մարզային և քաղաքային իշխանություններին՝ ճամբարային ծրագրերին աջակցելու համար: Ճամբարականների երեկոն ուղեկցվեց համերգային ծրագրով: Ելույթ ունեցան Վանաձորի քաղաքապետարանի մշակույթի բաժնի մանկապատանեկան և երիտասարդական բաժնի համույթները: Հանդիսությունը եզրափակվեց հրավառությամբ:

Մանուկների համար հետաքրքիր և բովանդակալից է անցնում ճամբարային առօրյան:

Առավոտյան տողանից հետո երեխաների համար «Կռունկ» ճամբարում կազմակերպվում են Հայոց Եկեղեցու պատմությանը և մշակույթին նվիրված դասընթացներ: Ճամբարականները մասնակցում են ճամբարի «Սրբոց մանկանց» մատուռում մատուցվող Ս. Պատարագին, ինչպես նաև կազմակերպվող ուխտագնացություններին:

Երեխաներին այցելում և նրանց առօրյան իրենց երգ ու պարով է՛լ ավելի բովանդակալից ու հետաքրքրական են դարձնում Մայր Աթոռ Սուրբ Էջմիածնի և ՀԲԸՄ Հայորդյաց տան սաները, Վանաձորի քաղաքապետարանի մշակույթի բաժնի մանկապատանեկան և երիտասարդական բաժնի համույթները, YMCA կազմակերպության մանկապատանեկան խմբակը, պատանի երգիչները: Ճամբարականների համար ավանդույթ դարձած մշակութային միջոցառումներին զուգահեռ առօրյան հագեցած է մտավոր ու մարզական խաղերով, միջոցկատային մրցույթներով, զինվորականների հետ հանդիպումներով, որը նպաստում է մանուկների հայրենասիրական դաստիարակությանը: Գործում են նաև աշխատանքի ու նկարչության խմբակներ: Հայ Առաքելական Եկեղեցու ԱՄՆ հայոց Արևելյան թեմի Եկեղեցասեր

երիտասարդաց միության թվով 30 անդամներ հյուրընկալվել են ճամբարում և ճամբարականներին սովորեցնում են անզլերեն:

Ճամբարային առօրյան ուղեկցվում է նաև թեմի երիտասարդաց միության անդամների՝ ճամբար այցելությամբ: Այս անգամ երիտասարդները ճամբարում հանդիպեցին ԱՄՆ հայոց Արևելյան թեմի Եկեղեցասեր երիտասարդաց միության (CYMA) անդամների հետ: Սրբազան Հոր օրհնության և ողջույնի խոսքին հաջորդեց երիտասարդների ծանոթացումը միմյանց հետ և առաջիկա ծրագրերին, ապա վեր հանվեցին հայաստանաբնակ և սփյուռքահայ երիտասարդների առջև ծառայած խնդիրները: Կարևորելով նմանօրինակ հոգևոր ճամբարի դերը հայ մանուկի հայեցի կրթության ու դաստիարակության գործում՝ երիտասարդները առաջնային համարեցին հայապահպանության խնդիրը և որոշեցին իրականացնել համատեղ ծրագրեր՝ ի նպաստ Մայր Եկեղեցու պայծառացման և Հայրենիքի բարգավաճման:

## ՀՕՖ-Ի ՀԵՐԹԱԿԱՆ ԲԱՐԵԳՈՐԾԱԿԱՆ ԱՅՑԸ ՎԱՆԱԶՈՐ

Հունիսի 27-ին ՀՕՖ բարեգործական կազմակերպության վարչության անդամները, իրենց առաքելությանը հավատարիմ, հերթական բարեգործությամբ այցելեցին Գուգարաց թեմ: Նրանց աջակցությամբ Վանաձորի թիվ 1 հիվանդանոցային համալիրում բացվեց տոմոգրաֆիայի կաբինետ: Գուգարաց թեմի առաջնորդ Ս. Սեպուհեպա. Չուլջյանը, մեծապես կարևորելով նմանօրինակ բարեգործությունը, իր հարական օրհնությունը բաշխեց և գնահատանքի խոսք ուղղեց ՀՕՖ-ի անդամներին. «Ավերիչ երկրաշարժից հետո մենք փորձում ենք վերականգնել մեր առողջապահական հիմնարկները և վերազինել դրանք ժամանակակից բժշկական սարքավորումներով: Տոմոգրաֆիկ կաբինետի բացումը Լոռու մարզի բնակիչներին հնարավորություն կտա հետայսու առանց մայրաքաղաք հասնելու, ժամանակ և գումար խնայելով, անցնել համապատասխան բժշկական հետազոտում: Ուստի ողջունում և մեր երախտագիտությունն ենք հայտնում ՀՕՖ-ին՝ հերթական բարեգործության համար»:

Հիվանդանոցային համալիրից ՀՕՖ-ի անդամները Սրբազան Հոր առաջնորդությամբ այցելեցին թեմապատկան «Օիժեռնակ» ճամբար, որի վերանորոգման և կահավորման գործում իր կարևոր ավանդն ունի նաև ՀՕՖ-ը: Նրանք հանդիպեցին ճամբարականների հետ, ծանոթացան ճամբարի առօրյային ու պայմաններին, ունկնդրեցին «Վարդանանց հետնորդներ» փողային նվագախմբի համերգային կատարումները:

Ճամբարում տեղակայված Սրբոց Մանկանց մատուռում առ Աստված աղոթք բարձրացրին սփյուռքահայ մեր հայրենակիցները՝ աստվածային սիրով ու բարությանը շարունակելու իրենց աստվածահաճ ընթացքը: